

Jus Mon Endi Polpu Gos Wumb Kin Kindim

Jus Pulum Mon Ei

¹ Na Jiisas kin ekii sip kin, eim nge kongun wu molup kin, nanim Jeims nge angim mol. Na mon ei polup kin, wumb ombu Gos eim wii topu “Nanim kin ekii sik nanim nge wumb mulngii,” pa ninim, wumb ei kin nognd. Ngop kin, wumb ombu enim, Erinjpin Gos nge noman ngolum ol ei nge, piram mulangin kin, nga enim Jiisas Kraiss eim angil ele tep ka erang molmun.

² Pe Gos eim kapli enim kin kaimb sipi kin, nga eim erang enim noman tukrung emin ka seng kin, nga eim am enim kin noman kulpu ngolum ol ombu ei, enim kin pei mendpil tonu opu pengli!

Gos Nge Ek Ka Opu Orung Wumb

³ Na angnan nol mendpil, nanim enim kin noman to piip kin, mon pulmbii ni piinj mon ei, pe puls. Puls mon ei, Gos eim sinim si orung simba ei, pe na mon ei polup kin, enim kin ngond. Na nemb enim paki tang kin, enim nge pii gii ei ambil gii nik dinga kindik kin wumb ek kend tok kun pinaim mil nik kin, andan to ngolumun wumb ei kin kan kun erik mulngii. Molkin, kunum endeim mendpil Gos eim sinim pii gii wumb pei kin ngum pii gii ei, tep ka erpin kin dinga kindipin kin, pii gii ei ambil gii ni mulmun. ⁴ Nanim ek ei mil nip ngond ei, nimbil erang wumb kombur

ek kend kun pinalim wumb ei koi erik molk kin, en enim, enim kin tep to mulmun. Molk kin en enim ol kun pinalim mil erngii ei, sinim Gos nge noman ka ngolum ol ei kin en enim to eipi eipi kindik kin ol eipi endi elmin. Erik kin, en enim ol kis kanim kanim ngenj noman kul ngumba ni piik elmin. Erik kin en enim sinim Jiisas Kraais Owundu sinim tep er molum Owundu ei, en enim bul ngok kin yi elmin. Kumb ok Gos nge ek ka si, ni tor kindpi kin yi nirim. Wumb ol kis elmin ele nge Gos kos owundu simba kunum ei en enim kumep kis singii ei sim salim. ⁵ Pe nga na enim nemb piingii ei nge, enim ok piik kin, kanik enjing ei, Gos eim Esrel wumb Eisip mulnjung konu ele, eim paki to se mengpi kin, Eisip konu tor tu wum. Tu wang kin, wumb ombu, eim kin pii gii ninenjing wumb ei, ekii se, eim to kondpu kis er si kindim. ⁶ Nga enim piingii ei, enjel en enim Gos ngopu kin, tep erik mulei, a nirim konu ele, si kindik, yi erangin kin, Gos eim en enim ambilpi, sipi kin, konu endi kindang molmun. Molk kin, ekii mul mei poru nimba kunum ele, Gos eim sipi kan ngii mil kindang konu kis ele, kunum kunum mulngii. Nimbil erang en enim Gos ngum kongun ei, mandi ele erik mulenjing. Mularik kin, nga Gos en enim dinga ngopu ele molk kin, tep erei, nirim ei mil, si kindnjing. Si kindangin kin, en enim Gos kos owundu piimba kunum owundu ei, eim enim konu kis ele kindmba. ⁷ Ei yi mil ku, Sorom kin Gomora konu owundu tal nin, nga konu kombur orung orung mandi sirim ei, enjel erik kin, ol kis enjing ei, dup opu nopo kin, konu kin, wumb ni pei, to kis erpi eipi eipi

kindrim. Kindang kin, sinim noman to piipin mulmun ei, Gos wumb nii endi ol kis kun pinaim mił er andiim ei, Gos eim wumb ei kin, ol yi ku erpi ngumba. Ngumba ei dup konu kis ele, kunum kunum pira nop mulang kin, en enim ngenj kumbii kis singii. ⁸ Yi mił ku, wumb ol yi enjing mił ku, wumb ombu en enim or kumb min men mił kenjing ei, en enim nge ngenj ele ok kis erik elmin. Nga yi ku sinim Owundu nge noman dinga ei, en enim ek buł ambilk kin toluł elmin. Nga yi ku, en enim tonu epin konu ele enjel ei nge, se ek kul sik yi erik elmin. ⁹ Ba ok enjel owundu Maikel molpu kin, kunum endi eim Gos nge opu orung wu kis Seisen kin ek mił erkil kin, Moses nge ngenj ei nikił, ek mił erkil, ba enjel owundu Maikel eim, ek endi nipi kin, Gos nge opu orung wu kis Seisen, “Nim ol kis kun pinaim mił en” pa ninerim mon; ba eim yi nirim, “Owundu eim nim ek dinga mendpił nipi kin ol kis en ele nge ngonum,” nipi yi nirim. ¹⁰ Ba wu ombu en enim pei ei epi ombu, pii kun enalmin ele nge, en enim ek kis nik kin, nga en enim epi pii kun enmin epi kanim kanim ombu, en enim kung owu mił, ol kanim enim ele yi palim ei, noman to piik enalmin mon. Ol ele nge, en enim kin kumep kis ngopu kin to kis ermba. ¹¹ Yi mił en enim kan kun erik mulngii! Nimbił erang en enim Gos kin ekii sinerim wu Kein, eim erim ol ei, en enim yi ku elmin. Nga en enim ku nin epi simin ni piik kin, en enim erik ol ei mił wu Beilim yi ku piipi eririm. Nga yi ku kumb ok wu Kora eim ek dinga piipi kin ekii sineririm ei mił ku, en enim yi ku erik kin, Kora eririm ol ei mił Gos eim erpi

kumep kis ngurum mił yi ku en enim am puk kin, konu kis ele pungi. ¹² Yi mił wu ombu en enim mundun ming penj mołum ei mił mołmun. Molk kin, enim men ngii kuni owundu endi nungii ei nge, en enim singambił kulanmin. Kularik kin, en enim nge mendpił noman to piik kuni en enim mendpił nonmun. Nok kin, en enim yi mił kupu muł endi, jipił topu kin, nga konu tunarpi kin, konu pop topu, sipnim ei mił; nga yi mił ku, ond endi angpi, onguł pei topu kin, tengngii kunum mong top mulalı́m ei mił ku; nga ond dumbuł pei kulii erpi kin, kołpu numenj tonum ei, mił mołmun. ¹³ Nga en enim yi mił ep noł topu kin, ko wupu onum mił, en enim oł kis kun pinałim mił enmin ei yi mił. En enim noł wer ele, noł milali kindpi mołum ei mił, en enim singambił sik kin, oł kis yi erik mołmun. Molk kin en enim yi mił kor kanjip endi pupu kin ele pepi ele pepi, enim mił, yi erik mołmun; ba Gos konu endi er sim sałim ei emii mendpił peng mułngii.

¹⁴⁻¹⁵ Nga Einok eim ok yi mił nirim, wu ombu ek kend tok kun pinałim ninmin wu ombu kin tonu omba ek ei, piipi nirim. Andam tonu opu multum nga Einok eim tonu opu mołpu kin, ek nipi eririm ei, Andam nge buł morung wumb tilap angıl orung nga tał tonu ok mulk kunum ele, eim tonu opu mołpu kin ek ni tor kindpi kin, yi nirim. Eim yi nirim, “Enim piyei! Owundu eim kin, eim nge enjel pei tonu, kanjip mołum ei mił, yi pei mendpił kaplı ongii,” pa nim. Yi erpi opu kin, eim kaplı wumb pei kii si orung kindpi kin, kos piimba. Piipi kin, eim pii gii ninanmin wumb ei, oł kis kanim kanim enjing ei, kii sipi

kin, kos piimba. Piipi kin, nga ek kis kanim kanim endi, Gos kin ninjing kin, yi ku kii si ngopu kin kos piimba. ¹⁶ Wu ombu en enim kunum kunum nu gultam nik kin, en enim elmin ol ei sipik kin, wumb eipi elmin pa nik elmin; nga en enim noman ele, ol kis kun pinaim mi erii nilim ei, ekii sik elmin. Pe nga en enim ek dinga nik kin, wumb piingii ei, “Sin sinim wumb owundu molmun,” ni piingii nik yi elmin. Nga en enim wumb eipi nge epi endi simin ni piik kin, kenim ni elmin.

Enim Pii Gii Ambil Gii Ningii

¹⁷ Ba nanim nge wumb pul mi ei, enim piyei! Ok enim Jiisas Kraiss Owundu nge ek se andilmin wu ombu ek ni tor kindnjing ek ei piingii! ¹⁸ Wumb ombu enim, enim kin yi ninjing, “Mu mei poru nimba kunum ei, wu kombur ongii ok pendik kin, enim kin tokul erik ngungii. Ngok kin, noman to piinarik kin, ol kis ombu, ekii sik pungii,” pa ninjing. ¹⁹ Wu yi nge ombu, en enim erik kin, wumb sipik tilap eipi eipi kindik kin, erangin mulngii. Molk kin, en enim noman ya mei ele, wu noman palim mi, ekii sik erik kin, punmun ei, Gos Gui Ka ei, en enim kin mulaim mon. ²⁰ Ba enim nanim angnan nol; enim noman tuk ele dinga kindik kin, en enim pii gii kun ka palim mi, dinga kindik mulngii! Molk kin, enim kunum kunum prei erngii ei, Gos Gui Ka ele nge, prei erngii! ²¹ Nga en enim Gos noman kultum ol ele nge, enim kapli no pek mulngii! Yi erik kin, nga Jiisas Kraiss sinim Owundu nge kaimb sipi kin,

sinim ngolum ol ei, peni ele tor omba kunum ei, enim kunum kunum kui er mulngii.

²² Nga enim wumb kombur pii gii dinga pinerang molmun wumb ei kin, kaimb sik kin paki tok yi erngii. ²³ Nga wumb ombu en enim dup konu kis ele mił molmun ei, kapli enim sikir erik, si orung singii. Sik kin, enim kapli gał kulk kin, kaimb sik enmin ol ei nge, wumb kombur kin yi erik ngungii. Ngok kin, konduk ok nge penj mendpił molum ei mił noman tuk ol kis salim ei, enim kanik kun erik kin, buł ngok kin gał kulk mulngii.

Prei Erpin Ek Ka Nipin Gos Ngumun

²⁴ Pe nga Gos eim kapli enim kan kun erpi kin, se mulang kin enim bok tok orung puk kin, ol kis kun pinalim mił yi enerngii mon! Eim kapli enim si mengpi opu kin, eim tilang dinga owundu ermba kumb ele tu wumba. Tu wang kin, enim nge ol kis endi pinerang kin, enim ka mendpił piik mulngii. ²⁵ Gos ei Gos endeim mendpił molum ei sinim se orung sim pulwu ei, eim Jiisas Krai sinim nge Owundu ei, eim kongun erim ele nge, sinim se orung sipi kin, eim kin sim. Seng kin, sinim kapli eim embe kapli ambil tonu kindmin. Kindamin kin, eim kapli King Owundu mulmba ei, kapli dinga owundu mendpił salim; nga eim epi kanim kanim pei ei eim peng tep erpi molum ei pulwu. Eim kumb ok molulum. Pe eim molum ku; nga ekii ei eim kunum kunum molpu ba ku. Ei keimi!

Gos Nge Ek Ka Ei Sinim Kin Ngolum
The New Testament in the Nii Language of Papua New
Guinea

Nupela Testamen long tok ples Nii long Niugini

copyright © 1980 Wycliffe Bible Translators, Inc.

Language: Nii

Dialect: Central Wahgi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 11 Nov 2022 from source files dated 9 Oct 2020

57529bce-9e23-5350-904d-243a1b359818